

## **Bases reguladoras para a concesión das axudas a deportistas recoñecidos coa categoría de deportista de alto nivel (DEPO\_DAN e DEPO\_DAN+) e deportista promesa (DEPO\_PROMESA) da provincia de Pontevedra en 2023**

O deporte é unha actividade esencial, enormemente enriquecedora e xeradora de benestar persoal. Ademais, constitúe un importante instrumento de cohesión e integración social, de transmisión de valores e de impulso económico.

Na Lei 39/2022, de 30 de decembro, do deporte determínase que o deporte de alto nivel ten un interese para o Estado en tanto que constitúe unha actividade e un factor esencial no desenvolvemento deportivo polo estímulo que supón para o fomento do deporte base, en virtude das esixencias técnicas e científicas da súa preparación, e pola súa función representativa de España nas probas ou nas competicións deportivas oficiais de carácter internacional.

Na Lei 3/2012, de 2 de abril, do deporte de Galicia recóllese entre os seus principios xerais a promoción do deporte de competición e de alto nivel. Así mesmo, a lei atribúelles ás deputacións provinciais competencias propias de fomento, promoción e difusión do deporte.

Unha das manifestacións clásicas da actividade de fomento é a concesión de axudas, que neste caso se configura como un instrumento básico para facilitar o acceso á práctica deportiva e fomentar a participación en actividades organizadas polas federacións deportivas.

En 2019 a Deputación de Pontevedra creou a cualificación de alto nivel (DEPO\_DAN e DEPO\_DAN +) e promesa (DEPO\_PROMESA) da provincia de Pontevedra, coa finalidade de concederlles axudas a deportistas desta categoría e así apoiar e posibilitar a súa participación nas competicións internacionais e nacionais, e que poidan conseguir os logros que lles permitan acadar futuras metas deportivas.

Con estes antecedentes, a Deputación de Pontevedra aproba, a través desta convocatoria, unha nova liña de axudas para o fomento do deporte de alto nivel dirixidas a todas e todos os deportistas que acaden a categoría de alto nivel (DEPO\_DAN e DEPO\_DAN +) ou promesa (DEPO\_PROMESA) da provincia de Pontevedra no transcurso desta convocatoria.

De acordo co artigo 22 da Lei 38/2003, de 17 de novembro, xeral de subvencións (LXS), o procedemento ordinario de concesión de subvencións tramitarase en réxime de concorrencia competitiva, para o que se terán en conta os criterios de valoración previamente fixados nas



bases reguladoras da convocatoria, que neste caso atenderán aos resultados obtidos polas e polos deportistas nas distintas competicións oficiais no ano correspondente.

Segundo o exposto, e ao abeiro do establecido na LXS, na Lei 39/2015, de 1 de outubro, do procedemento administrativo común das administracións públicas (LPACAP), na Ordenanza reguladora de subvencións da Deputación de Pontevedra e na demais normativa aplicable, convócase esta liña de axudas para o ano 2022, de acordo coas seguintes

## **BASES**

### **1. Obxecto**

Esta convocatoria ten por obxecto establecer as bases reguladoras da concesión de axudas destinadas ao deporte de alto nivel da provincia de Pontevedra.

### **2. Persoas beneficiarias**

Poderán ser beneficiarias destas axudas as persoas que obteñan a categoría de alto nivel da provincia de Pontevedra.

Non poderán ter a condición de beneficiarias as persoas solicitantes que concorran nalgunha das circunstancias previstas nos artigos 13.2 da LXS e 10.2 da Lei 9/2007, de 13 de xuño, de subvencións de Galicia (LSG).

Cada persoa solicitante só poderá optar a unha única axuda.

Para os efectos de estas bases existen tres categorías de alto nivel da provincia, cos seguintes requisitos:

- Categoría DEPO\_DAN e DEPO\_DAN +:

Para obter a categoría DEPO\_DAN e DEPO\_DAN + as persoas solicitantes deberán cumprir os seguintes requisitos:

- Nacer na provincia de Pontevedra ou estar empadroadas nesta polo menos desde o 1 de xaneiro de 2022.
- Estar recoñecidas coa condición de alto nivel pola Comunidade Autónoma de Galicia (DGAN) ou polo Estado español (DAN) no momento da presentación da solicitude.



- A condición da categoría DEPO\_DAN e DEPO\_DAN + poderá recoñecérselles ás e aos deportistas, ás adestradoras e adestradores e ás e aos xuíces-árbitros.
- Estar en posesión dunha licenza deportiva vixente expedida por unha federación deportiva.
- Non estar a cumprir, no momento da presentación da solicitude, ningunha sanción disciplinaria deportiva ou administrativa firme pola comisión dunha infracción de carácter grave ou moi grave, ou por dopaxe.

- Categoría DEPO\_PROMESA:

Para obter a categoría DEPO\_PROMESA as persoas solicitantes deberán cumprir os seguintes requisitos:

- Nacer na provincia de Pontevedra ou estar empadroadas nesta polo menos desde o 1 de xaneiro de 2022.
- Nacer entre 2007 e 2011 (ambos os dous incluídos).
- A condición da categoría DEPO\_PROMESA poderá recoñecérselles só ás e aos deportistas.
- Acreditar o nivel deportivo esixido pola Deputación de Pontevedra para recibir unha das axudas definidas no apartado 4 para o grupo B. Para acreditar o nivel deportivo, a Deputación de Pontevedra esixe que no ano 2022 se quedase entre os tres primeiros postos no Campionato de España ou se participase nun campionato de Europa ou do mundo.
- Estar en posesión dunha licenza deportiva vixente expedida por unha federación deportiva.
- Non estar a cumprir, no momento da presentación da solicitude, ningunha sanción disciplinaria deportiva ou administrativa firme pola comisión dunha infracción de carácter grave ou moi grave, ou por dopaxe.

### 3. Financiamento das axudas

A contía total destinada a estas axudas estará suxeita á dispoñibilidade orzamentaria e convocarase con cargo á aplicación 23/340.3400.481.01 do Orzamento da Deputación para o ano 2023 por un importe total de douscentos cincuenta e mil (250.000,00) euros.



#### 4. Tipos de axudas

Establécense os seguintes tipos de axudas para cada categoría:

##### Grupo A: axudas de alto nivel (DEPO\_DAN)

Axudas	Importe	Resultado
A1	2.000 €	1.º, 2.º ou 3.º posto na copa do mundo (C. M.)
A2	1.250 €	Do 4.º posto en diante na C. M. ou 1.º, 2.º ou 3.º posto no campionato de Europa (C. EU.)
A3	900 €	Do 4.º posto en diante no C. EU. ou 1.º, 2.º ou 3.º posto no campionato de España (C. ESP.)
A4	500 €	Do 4.º posto en diante no C. ESP. ou 1.º, 2.º ou 3.º posto no campionato galego (C. GAL.)

##### Grupo A+: axudas de alto nivel para persoas con discapacidade física, intelectual ou visual (DEPO\_DAN +)

Axudas	Importe	Resultado
A+1	3.000 €	1.º, 2.º ou 3.º posto na copa do mundo (C. M.)
A+2	2.000 €	Do 4.º posto en diante na C. M. ou 1.º, 2.º ou 3.º posto no campionato de Europa (C. EU.)
A+3	1.500 €	Do 4.º posto en diante no C. EU. ou 1.º, 2.º ou 3.º posto no campionato de España (C. ESP.)
A+4	1.000 €	Do 4.º posto en diante no C. ESP. ou 1.º, 2.º ou 3.º posto no campionato galego (C. GAL.)

##### Grupo B: axudas a deportistas promesa (DEPO\_PROMESA)

Axudas	Importe	Resultado
B1	1.200 €	1.º, 2.º ou 3.º posto na copa do mundo (C. M.)
B2	800 €	Do 4.º posto en diante na C. M. ou 1.º, 2.º ou 3.º posto no campionato de Europa (C. EU.)
B3	500 €	Do 4.º posto en diante no C. EU. ou 1.º, 2.º ou 3.º posto no C. ESP.

Normas que se deben ter en conta:

- O campionato do mundo, de Europa ou de España que se certifique corresponderá ao ano 2022; só se terá en conta o mellor resultado acadado en 2022.
- Para que unha proba deportiva sexa considerada como campionato do mundo, de Europa, de España ou de Galicia será necesario que teña a denominación de copa ou campionato da correspondente federación deportiva. No caso da denominación de copa de España ou de Galicia, cando estas competicións estean conformadas por varias probas e teñan clasificación final, só se valorará o posto da clasificación final e non a clasificación dunha única proba.



- Poderán valorarse competicións internacionais ou nacionais que, aínda que non sexan as que se designan de forma oficial como competicións con categoría de campionato do mundo, de Europa ou de España, estean incluídas nos calendarios oficiais e recoñecidas como probas de alto nivel pola federación correspondente, por exemplo o Tour de Francia ou a Volta a España. Estas terán que ser recoñecidas polo órgano instructor proposto para esta convocatoria, o cal, unha vez analizada a competición, lle outorgará unha cualificación.
- Excepcionalmente, poderán ser beneficiarias destas axudas as persoas que conten coa categoría de alto nivel da Deputación de Pontevedra e que concorran nalgunha das seguintes circunstancias:
  - Que tivese unha baixa deportiva por lesión debidamente xustificada durante a maior parte da temporada 2022 e acadase os resultados para acreditar o nivel deportivo (a lesión deberá ter unha duración mínima de 6 meses).
  - Que estivese en período de xestación ou no de baixa maternal no ano 2022 e acadase os resultados para acreditar o nivel deportivo.
  - En calquera dos casos anteriores, o resultado debe corresponderse cos 12 meses inmediatamente anteriores á baixa deportiva, maternal ou de xestación, e, en todo caso, será a Comisión de Valoración a que valide os feitos dependendo das características do deporte.
- Pola súa natureza, a competición deberá ser oficial, ter o recoñecemento da federación correspondente e figurar no calendario oficial.
- Terase en conta un único campionato por modalidade e categoría, aquel que tivese un maior nivel deportivo. O resultado certificado pola federación só poderá ser da clasificación final. En caso de existir máis dunha final, considerarase unicamente o resultado da final A.
- A Comisión de Valoración poderá invalidar un campionato se o considera insuficiente; isto dependerá das características do deporte, de se existen fases previas, do número de participantes e doutros.

## 5. Lugar de presentación de solicitudes

As solicitudes presentaranse preferentemente por medios electrónicos a través do formulario normalizado dispoñible na Sede electrónica da Deputación de Pontevedra, <https://sede.depo.gal>.



Opcionalmente, as solicitudes tamén poderán presentarse presencialmente en calquera dos lugares e dos rexistros establecidos na normativa reguladora do procedemento administrativo común.

Para a presentación das solicitudes, a Sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

## **6. Prazo de presentación de solicitudes**

O prazo de presentación de solicitudes será de quince (15) días hábiles e comezará a partir do día seguinte ao da publicación da convocatoria, do seu extracto no *Boletín Oficial da Provincia de Pontevedra* (BOPPO) e na Base de Datos Nacional de Subvencións.

## **7. Comprobación de datos**

Para a tramitación deste procedemento consultarase automaticamente os datos incluídos nos seguintes documentos elaborados polas administracións públicas:

- NIF das persoas solicitantes
- Certificación de residencia da persoa solicitante
- Certificación de estar ao día das obrigas tributarias coa Axencia Estatal Tributaria, coa Seguridade Social e coa Deputación de Pontevedra

Se as persoas interesadas se opuxesen ás devanditas consultas, deberán indicalo no cadro correspondente habilitado no formulario de inicio e achegar os documentos correspondentes.

Excepcionalmente, no caso de que algunha circunstancia imposibilitase obter os citados datos, poderáselles solicitar ás persoas interesadas que presenten os documentos correspondentes.

## **8. Documentación**

As persoas interesadas deberán presentar coa solicitude a seguinte documentación:

- Certificado deportivo (anexo I) emitido polas federacións no que se especifique o mellor resultado deportivo obtido no ano 2022.
- Libro de familia (só para as e os deportistas DEPO\_PROMESA menores de 14 anos).



- Nos supostos especificados na base 3 parágrafo 3, o correspondente certificado médico, no que se especifiquen a duración da baixa e o motivo.

A documentación complementaria presentarase preferiblemente por vía electrónica. As persoas interesadas responsabilizaranse da veracidade dos documentos que acheguen. Excepcionalmente, a Deputación de Pontevedra poderá requirir a presentación do documento orixinal para cotexalo coa copia electrónica presentada.

#### **9. Trámites administrativos posteriores á presentación de solicitudes e emenda destas**

Se a solicitude non reunise os datos esixidos na convocatoria ou calquera dos previstos no artigo 66 da LPACAP, requiriráselle á persoa interesada, de conformidade co establecido no artigo 68 desta lei, que, nun prazo de dez (10) días hábiles, emende as faltas ou presente os documentos preceptivos, e indicaráselle que, se non o fai, terase por desistida a súa solicitude, que se arquivará sen máis trámites.

Todos os trámites administrativos que as persoas interesadas deban realizar durante a tramitación deste procedemento faranse por medios electrónicos a través do modelo "2887054 Trámites administrativos xenéricos distintos da solicitude", dispoñible en <https://sede.depo.gal>.

Na Sede electrónica están dispoñibles unha serie de modelos xenéricos que as persoas interesadas poden utilizar para realizar as xestións máis habituais durante a tramitación administrativa (representación, emenda da solicitude, alegacións, renuncia ou recursos, entre outros). Estes modelos son comúns para os distintos procedementos e poderán empregarse sempre que a normativa reguladora do procedemento concreto para o que se vaian utilizar non estableza outros modelos específicos. Os modelos xenéricos poderán descargarse para anexalos a unha solicitude ou para realizar trámites sobre outros expedientes e presentalos electrónica ou presencialmente segundo a normativa reguladora do procedemento de que se trate. No formulario deberá indicarse, no seu caso, o procedemento para o que se efectúa o trámite. Os modelos están dispoñibles en:

<https://sede.depo.gal/web/public/dynamic/catalogo/tramitesxeneticos>.



## 10. Notificacións

As notificacións de resolucións e actos administrativos practicaranse preferentemente por medios electrónicos. As persoas interesadas que non estean obrigadas a recibir notificacións electrónicas poderán decidir e comunicar en calquera momento que as notificacións sucesivas se practiquen ou deixen de practicar por medios electrónicos.

As notificacións realizaranse a través do Servizo de Notificacións Electrónicas, na Sede electrónica da Deputación de Pontevedra, <https://sede.depo.gal>. Este sistema remitiralles ás persoas interesadas avisos da posta á disposición das notificacións á conta de correo que conste na solicitude. Estes avisos non terán, en ningún caso, efectos de notificación practicada e a súa falta non impedirá que esta se considere plenamente válida.

A persoa interesada deberá manifestar expresamente a modalidade escollida para a notificación (electrónica ou en papel).

As notificacións por medios electrónicos entenderanse practicadas no momento en que se acceda ao seu contido. Se o envío da notificación electrónica non fose posible por problemas técnicos, a Deputación de Pontevedra practicará a notificación polos medios previstos na normativa reguladora do procedemento administrativo común.

## 11. Procedemento de concesión

O procedemento de concesión das axudas realizarase en réxime de concorrencia; en ningún caso a suma total das axudas concedidas poderá superar o orzamento máximo previsto nestas bases.

O proceso de concesión será o seguinte:

En caso de que o crédito dispoñible fose insuficiente para poder outorgar o importe íntegro das axudas, producirase un rateo proporcional entre todos os importes ata cubrir o crédito dispoñible.

## 12. Instrución do procedemento

- 1) A instrución do procedemento de concesión de subvencións correspóndelle ao xefe do Servizo de Deportes.

A instrución do procedemento de concesión comprenderá as seguintes fases:



- Estudo e comprobación de todas as solicitudes polo servizo instrutor, que realizará de oficio todas as actuacións que estime necesarias para a determinación, o coñecemento e a comprobación dos datos.
  - Informe-proposta do xefe de servizo no que figure a valoración das solicitudes, de acordo cos criterios de concesión, explicando o sistema de valoración seguido e relacionando as solicitudes por orde e sinalando a subvención correspondente a cada unha delas. Así mesmo, relacionaranse as solicitudes desestimadas, e explicaranse as razóns da súa desestimación.
  - Informe-proposta por parte da comisión de valoración, que estará composta por:
    - Presidente: o Xefe do servizo de Deportes
    - Vogais: un membro do persoal técnico do Servizo de Deportes
    - Secretaria ou secretario: unha funcionaria ou funcionario do Servizo de Deportes.
  - Proposta de resolución provisional. O órgano instrutor, á vista do expediente e do informe da comisión, formulará unha proposta de resolución provisional debidamente motivada, que será notificada coa súa publicación na sede electrónica da Deputación de Pontevedra. Establecerase un período de dez (10) días naturais para presentar alegacións desde a posta á disposición da notificación.
- 2) Proposta de resolución definitiva. Examinadas as alegacións presentadas, no seu caso, formularase a proposta de resolución definitiva, que deberá expresar a persoa solicitante ou a relación de solicitantes para os que se propón a concesión da subvención, e a súa contía. Tamén recollerá as solicitudes rexeitadas e os motivos do rexeitamento.
- 3) Informe de fiscalización de Intervención de todos os expedientes e da proposta de resolución definitiva.

### **13. Resolución do procedemento**

A proposta de resolución definitiva formulada polo órgano instrutor someterase á aprobación do órgano competente, que resolverá o procedemento.

O acto de resolución do procedemento publicarase no BOPPO e terá os efectos dunha notificación por tratarse dun procedemento de concorrencia competitiva (artigo 45 da LPACAP).



Así mesmo, serán igualmente obxecto de publicidade a través da páxina web da Deputación de Pontevedra.

O prazo máximo para resolver e notificar a resolución do procedemento non poderá exceder os seis (6) meses, contados a partir do día seguinte a aquel no que finalice o prazo de presentación das solicitudes. O vencemento do prazo máximo sen notificar a resolución, lexítima as persoas interesadas para entender desestimada por silencio administrativo a solicitude de concesión da subvención.

#### **14. Publicación de actos**

A resolución que lle pon fin ao procedemento publicarase no BOPPO, de conformidade co establecido no artigo 45 da LPACAP.

Así mesmo, será igualmente obxecto de publicidade a través da páxina web da Deputación de Pontevedra.

#### **15. Pagamento e xustificación**

Unha vez notificadas as axudas concedidas, estas aboaránselles ás e os deportistas.

O pagamento efectuarase mediante unha transferencia bancaria á conta sinalada na solicitude. Para cobrar a subvención as e os deportistas deberán estar ao día das súas obrigas tributarias coa Axencia Estatal Tributaria, coa Facenda galega, coa Seguridade Social e coa Deputación.

No momento da concesión das axudas ás e aos deportistas deberanse ter en conta as retencións do IRPF, se as houbese.

#### **16. Obrigas das persoas beneficiarias**

As persoas beneficiarias deberán cumprir coas obrigas da LSG. Concretamente, durante este exercicio e o seguinte deberán:

- Cumprir e aceptar todo o estipulado nestas bases.
- Darlle a adecuada publicidade ao carácter público do financiamento das axudas e colaborar coa Deputación na promoción do deporte e da actividade física na provincia se esta o requirise.



- Participar nas actividades de difusión co fin de demostrar o grao de aproveitamento destas axudas, así como nas actividades de promoción do deporte que poida programar a Deputación de Pontevedra.
- Asistir á Gala do Deporte organizada pola Deputación de Pontevedra.
- Someterse ás actuacións de comprobación, así como a calquera outra actuación que puidesen efectuar os órganos de control competentes, para o que se presentará canta información se lles requira no exercicio das actuacións correspondentes.

### **17. Transparencia e bo goberno**

De conformidade co establecido na normativa de transparencia e bo goberno e no artigo 15 da LSG, a Deputación de Pontevedra publicará na súa páxina web a relación oficial de persoas beneficiarias e o importe das axudas concedidas. Incluirá igualmente as referidas axudas e as sancións que, como consecuencia delas, puidesen impoñerse nos correspondentes rexistros públicos, polo que a presentación da solicitude leva implícita a autorización para o tratamento necesario dos datos das persoas beneficiarias e a referida publicidade.

### **18. Devolución e reintegro**

As subvencións concedidas deberán devolverse ou reintegrarse nos seguintes casos:

- Por obtelas falseando as condicións requiridas
- Por non aplicalas aos fins para os que se concederon
- Por incumprir a persoa beneficiaria as obrigas asumidas e as condicións fixadas nestas bases

### **19. Protección de datos**

Os datos persoais obtidos neste procedemento serán obxecto de tratamento por parte da Deputación de Pontevedra, en calidade de órgano responsable, coa finalidade de xestionalos, verificar os datos e os documentos que a persoa interesada declare na súa solicitude para comprobar a exactitude destes e levar a cabo todas as actuacións administrativas que, no seu caso, deriven.



A lexitimación para o tratamento dos datos baséase no cumprimento dunha tarefa de interese público ou no exercicio de poderes públicos segundo as normas de rango legal recollidas no apartado “normativa aplicable”, dispoñible na ficha de procedemento en <https://sede.depo.gal>. Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia. As persoas interesadas poderán acceder, rectificar e suprimir os seus datos, así como exercer outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.

## **20. Recursos**

Contra estas bases e as resolucións administrativas que se adopten na súa execución poderá interporse un recurso potestativo de reposición ante o órgano que as ditase no prazo dun (1) mes, que se entenderá como desestimado se transcorrese este período de tempo sen recibir contestación; neste caso, poderá interpoñerse un recurso contencioso-administrativo ante o Xulgado do Contencioso-Administrativo, segundo o previsto no artigo 8 da Lei 29/1998, de 13 de xullo, da xurisdición contencioso-administrativa, no prazo de dous (2) meses. Igualmente, contra esta resolución tamén poderá interpoñerse directamente o recurso contencioso-administrativo no prazo indicado. En todos os casos, os prazos contaránse a partir do día seguinte ao da recepción da correspondente notificación ou da data na que o recurso de reposición se entendese como desestimado.

